

周文忠公全集卷一百五

宋廬陵周必大著

邑後學劉峙重刊

玉堂類稿卷第五

內制

學士劉珙三辭免起復乞早賜抽還中使徐偁

乾道七年六月二十三日

朕乃者起卿以西樞付卿以上流手札丁寧馳遣暫御所以示必用者蓋有三說軍旅爲今重事理可奪情公侯以國爲家義難自己一也惟乃祖父忠槩有聞何以似之莫如移孝二也卿比鎮荊州按行襄漢規模甫定未迄於成今不強起孰卒吾事三也而卿連章累牘不過以名教爲疑夫無故而自請短喪宰予所以獲罪有爲而要經服事閔子所以合禮漢儒之傳寧無據哉且本朝特起故事非但執政而已文翰近臣如王禹偁楊億輩皆不得已勉共上命當是之時中外豈不綏靜彼二臣者學識豈不高明矧在於今尤難執一亟承委重之意毋蹈辭難之嫌所請宜不允

觀文殿大學士左光祿大夫知福州陳俊卿

再辭免轉官

六月二十四日

勅俊卿省所奏劄子再辭免收捕海賊特轉一官恩命事具悉卿夙推德望常翌乾

臺豈必計功面後增秩顧朕方大明黜陟砥礪中外卿於此時宣國威靈俾海道肅清姦宄懲艾厥績茂焉進階一等倡吾九牧匪直爲卿寵也書不云乎德懋懋官功懋懋賞朕惟兼用卿復何辭所辭宜不允不得再有陳請

學士劉珙

勅劉珙省卿四上劄子辭免起復恩命乞檢會前奏抽還中使徐僞事具悉朕詠詩之雅有常德以立武事觀易之象除戎器以戒不虞用是起卿則於奪情之典初未爲過而璽書屢下懇避已確重以疾諗諒非飾詞况夫暴秋陽事道路使卿或愆調護之節寧不惻我心乎俛聽終喪朕固靡忘於眷注也所請宜允

右朝散郎權尙書吏部侍郎王

之奇 辭免落權字 七月十三日

勅之奇省所奏辭除吏部侍郎恩命事具悉維乃先正甚文且武中興盛際蔚爲名臣閎蘊僅施元身遽沒餘慶所積在其後人卿洪毅精明力紹家學發揚普詔服於禁塗典銓未幾人以爲允因能而任就正貳卿成命已行當仁何避所辭宜不允

侍衛親軍步軍都指揮使宜州觀察使主管殿前司公事王

友直 乞宮祠 七月

勅友直省所奏乞除一內外宮祠事具悉朕於將帥審擇之信任之固不輕以一毀一譽移也卿拱護殿巖未再閱月何嫌何疑而遽求去夫奉法從事公爾忘私行之有常人則誰怨姑安爾位毋拂朕心所請宜不允

左朝散郎致仕巫

伋

辭免復龍圖閣學士

八月九日

朕乃者躬款泰壇備成熙事德洋恩普徧於遠邇惟時共政之舊告老之臣固不可以一眚遣也俶加秘職盡洗丹書夫身在林泉之間而名貫西清之籍寵章隆厚足耀垂車毋或固辭亟承帝祉所請宜不允

觀文殿學士左通議大夫提舉臨安府洞霄宮汪

澈

乞致仕

九月七日

卿厚重有常直方居簡進服廊廟謀猷允臧出臨藩維政事罔缺奉祠養疾昔不得已而聽之今乃辭祿未及之年在卿止足之計則善矣獨不體朕眷眷老成之意乎勉思自持毋或他慮所請宜不允

降授左中奉大夫劉

章

辭免顯謨閣學士

九月二十七日

進而攝常伯退而直西清此故事也至於加峻職越舊班則絕無而僅有焉日者首賁黃中之歸今復用之榮卿之去非以二老嘗從我於潛藩乎惟卿文學之優志氣

之裕正惟齒宿尙可告猷而曲折眷留莫回雅意光華均佚尙慰我心伐木之序不云乎不遺故舊則民德歸厚矣敬體優禮毋爲遜辭所請宜不允

太尉昭信軍節度使致仕曹

勛

辭免落致仕提舉皇城司

九月三十日

知止者臣子之誼用舊者人君之仁卿祇事兩朝視儀二府初終無玷忠謹有聞昔聽其歸旣彰冲尙今還以位庸示眷懷亟彈已掛之冠勉竭未愆之力所請宜不允

左中大夫參知政事四川宣撫使王

炎

辭免除樞密使應干恩數並依宰臣恩

命十月二十八日

朕惟卿奧學英才負名儒之望精忠閔慮有大臣之風使蜀三年厥功茂焉幾廷闕長欲下來歸之詔者屢矣而西南重寄弄印莫畀故推殊渥未改行臺蓋位崇則國體尊任久則士心附告廷之日縉紳黎庶咸曰允哉朕亦自欣用人授任之兩得也茲觀來諗乃謂不皇安者有五夫錄德定位非誤賞也以身徇國非市寵也朕之名器其愈重卿之名節其愈光又况江表督師元樞外拜隆興近制今實用之雖復力辭必成命之難回也所請宜不允

起復左朝奉大夫充敷文閣待制樞密都承旨兼戶部侍郎葉

衡

辭免戶部侍

郎十一月九日

勅葉衡省所奏劄子辭免除戶部侍郎依舊兼樞密都承旨恩命事具悉卿才華智略簡在予衷列職樞廷兼官民部蓋綽綽乎其有裕也孔子曰足食足兵民信之矣朕方以卿圖此三者是以事權雖舊而寵數則新尙攄獻納之遠猷焉用辭遜之常禮所請宜不允

敷文閣直學士左朝散郎知成都府張震乞外宮觀

文學政事惟通才爲能兼之卿頃在朕前有猷則告付之征鎮何適非宜邈是少

本別

巖作城方安仁愛其可求代乎况朕推誠無疑卿乃以謙自引非所望也益勤宣布慰

父老子弟之心所請宜不允

敷文閣直學士右中大夫知荊州府姜託辭免昨任寧國府修圩岸轉官恩命

十一月二十二日

增秩旌郡守漢制也而朕用之卿向治宛陵於農田蓋宣力焉隄防允修禾黍以茂今雖易鎮賞猶眡功茲用不待三載亟考而績詔音既不顧欲反汗邪所請宜不允

四川宣撫使王炎再辭免樞密使十二月一日

國家右置鴻樞幹旋兵柄其倚綏之重圖任之艱方吾宰司注意均也如卿文足以斷國論武足以嚆天威萬里護邊三年於此疇厥望實延登使聯雖未容借箸於前蓋已賴折衝於外朕志素定庶言亦諧固非以卿嘗貢移疾之章而有是發中之詔也申言五說無乃過疑朕既丁寧諭旨明其不然矣遜函未已豈亮眷懷勉趣欽承無稽我惟行之令所請宜不允

翰林學士左大中大夫知制誥兼侍讀王

職

乞致仕

十二月九日

卿靜重恭寬爲時耆舊潤色帝制久而愈華進趨昕朝老方益壯告歸之語胡爲而至哉且禁林優游義理相應固非有簿書期會之勞也尙詢黃髮毋跂二疏所請宜不允

龍圖閣直學士左朝奉大夫提舉江州太平興國宮周

操

辭免召赴行在

十二

月十九日

卿作德日休未嘗載僞故立朝則朕信之典郡則民安之蓋簪橐之耆英縉紳之令望也往聞嬰疾聽解郡章今病愈可造於朝是以有賜環之命惟古之良臣乃心罔不在王室雖千里不以爲遠而况崇朝之近一葦可杭乃欲辭行乎所請宜不允

左中大夫參知政事四川宣撫使王炎乞檢會前後陳乞宮祠辭免新除樞密

使 十二月二十五日

卿于役萬里厥今三載夷夏稔其風聲吏民懷其恩信稽之公望宜式遄袞繡之歸
揆以人情難久詠裳衣之制尙惟體國之有素雖復獨賢而弗辭乃涉春以來何移
疾之數旋觀手牘益慨予心既懇還樞柄之崇復深羨祠官之逸豈道之云遠未承
前詔之諄諄將禮有弗周是使歸心之切切苟或異此奚爲若斯朕方知臣下之勤
勞卿盍念功名之終始勉符推轂別佇賜環所請宜不允

觀文殿大學士左正議大夫知紹興軍府事蔣芾乞檢會前奏除宮祠

乾道八年正月

日七

卿自去歲以來數移病告珍臺閒館朕非有靳於卿也顧會稽輔藩徒得君重凡可
以損公上之須應州家之用者奏請朝聞免符夕下卿既知之矣獨不能爲朕少留
惠此一方乎昔汲黯多病臥閣歲餘而東海大治卿之啟處視黯何如乃必欲還郡
戟耶所請宜不允

光州觀察使高郵軍駐劄御前武鋒軍都統制兼知楚州陳敏乞外宮觀

正月

八日

將帥貴久任牧守戒數易朕於二者方謹守之卿入總天營出臨邊閫有勤績著乎兵民往城於方久念僕夫之瘁共武之服尙圖王國之安遏爾歸心體予眷意

侍衛親軍步軍都指揮使宜州觀察使主管殿前司公事王

友直乞外宮觀

月十八日

朕以卿勁勇絕人擢司嚴陞謂當許國皇恤其他而未涉三時繼有避嫌之請朕何賴焉且進而事君退而奉親忠孝之道可以兩得求閒雖切於義難俞所請宜不允

敷文閣直學士右中大夫提舉江州太平興國宮方

滋辭免知紹興府

正月

二十五日

在昔宣王采新田之芑惟時方叔壯元老之猷我圖牧御之能亦取踐馭之舊卿器資寬裕識略精深久推政事之才薦履禁嚴之地安於祠館鬱乃眷懷遂荒大東往率從於海表戎有良翰諒咸喜於邦人亦既剖符毋庸抗牘所請宜不允

虞

允文

辭免特進左丞相兼樞密使進封華國公加食邑實封

二月十三日

朕以非涼尊臨士民之上常懼日月逾邁志勤道遠故妙簡忠良光輔不逮以卿碩

德冠於當世淵謀合乎古人參稽師虞付以國政內之安百姓外之撫四夷上之調陰陽下之振法度朕既惟卿之聽卿亦惟力之竭此固朝野所共悉朕心所嘉賴也官名肇正就陟上臺庶言允諧豈必辭避且大勳未集德化未成誠當今之急務卿嘗力啟朕矣得不自任以天下之重紹乃辟於三代之隆乎安分知止蓋衆人之事丞相奚爲及此也所請宜不允

梁克家

辭免左正奉大夫右丞相兼樞密使進封清源郡開國公加食邑實封

朕之命相可謂不敢輕矣徐觀其事業詳試其謀謨逮夫德望已崇績效已著則信之不疑任之不貳夫豈偶然而已卿以英明冠多士精忠簡朕知不出都城遂間兩社其於彌縫庶政辨察百職功不少矣夫相有左右上應太微之象下存歷代之規朕意素以屬卿故由更制而發號焉非可以謙辭格也若乃張紀綱變風俗暢國威蘇民力朕固日夜念此卿既言之則當成之庶幾盡責難之功而使朕獲任賢之福不亦臣主俱榮哉所辭宜不允

附繳張說王之奇辭免西府奏

乾道八年二月十六日準御封付院張說王之奇辭免各除簽書樞密院事奏劄

並奉御批降詔不允臣流落之餘蒙陛下收拾收拭實在華近踰一年半矣碌碌備位補報闕然夙夜慚懼無以自處倘有所見若又不言陛下雖欲赦之如衆論何臣見昨除張說簽樞舉朝皆曰不可陛下欣然聽納旋卽改命曾未周歲復有此除羣言紛紛今猶昔也蓋以貴戚預政公私兩失不若坐享高爵厚祿之爲安陛下神聖固已洞照諒說亦自深曉此理何待臣言也若謂兩府當間以武臣則願於大將中擇有威望可以運籌折衝者畀之誰敢異議臣非欲專任文吏也或云緣大臣薦用王之奇因而有此並命雖未可信然去年羣臣爭論之際傳聞聖諭云茲事誠誤以此觀之用說非陛下意不爲無據且當是時王之奇亦云曾入文字今却與說同升不知之奇以爲是耶非耶亦未當遽受也臣在隆興初與說同侍殿陛又與之奇同在六部情分頗熟素無嫌隙今非樂爲仇怨自取擯斥蓋義所當言不得不效論思之萬一耳昔唐元和間白居易在翰林奉宣草嚴綬江寧節度使孟元陽右羽林統軍制皆奏請裁量未敢便撰本朝元祐中帥臣避免拜之禮執政辭遷秩之命蘇軾當撰答詔亦嘗言其不可卒如所請今除用執政非節度統軍免拜遷秩比也臣雖視居易軾無能爲役顧職守其可廢哉所有二

人辭免不允詔書臣未敢具草取進止

附
貼黃

臣竊觀國朝有宣徽南北院使班均二府地親秩重文武大臣皆可爲之陞下方復古制若命討論用以處說尤爲優異未審聖意以爲然否仰戴恩憐忘其冒昧

伏俟誅戮

是日聖旨與在外宮觀
又有旨令日下出國門

通奉大夫葉

衡

辭免知建寧府乞外宮觀

淳熙二年九月十七日

卿才資備明術業閎茂凡所甄擢率由簡知十年之間遂賓臺衮中道而去予心歉然錫之左符與我共理冀宣惠澤庸副眷懷夫當軸於中輔政於外小大雖異其可以報主知行所學則一也引疾爲解朕何望焉所辭宜不允

簽書樞密院事李

彥穎

辭免參知政事

閏九月十九日

朕勵志萬微倚成四輔儀圖俊傑對司文武之權迭運均樞稽合祖宗之制政路無曠朝廷自尊卿學富詞雄體壯志裕恂恂守道恥求世俗之虛名疊疊告猷思護國家之元氣朕選於衆而知其可用斷於心而任之不疑自亮采於幾廷亶宣勞於旬歲運籌合意具孚帷幄之謀當軸處中宜贊廟堂之治在旋觀而已審奚固避之能

回所辭宜不允

翰林學士王

淮

辭免端明殿學士簽書樞密院事

同前

朕寤寐英髦贊襄宥密非純誠雅望何以鎮天下之浮非沉識訐謨何以定帷中之畫廟勝所繫疇咨敢輕卿德厚秉彝文純貫道更歷紹興之言路允謂舊人考觀近世之詞臣厥惟大手退食抱委蛇之節浚明宣夙夜之勞念久嚙於皇猷宜預裁於兵柄且積中者名彰於外而自後者人與其先予實爾知政將焉避毋確循於冲守其亟翼於鴻機

資政殿大學士中大夫沈

夏

辭免知鎮江府乞外宮觀

閏九月十一日

卿精明殫洽介潔簡廉萬里錫還言授之政而上書祈免至於三四重違懇惻俾殿朱方借曰病衰猶當臥理矧無他恙安用固辭勉佩印章體予眷顧所請宜不允

禮部尙書趙

雄

辭免兼侍讀

同前

昔元祐中名臣蘇軾以大宗伯進讀於金華拜恩之日首陳六事著在方冊朕甚嘉之卿以蜀莊之珍傳揚雄之學儷相如之文迪簡在廷華問彰徹侍言典禮榮口前修詩不云乎高山仰止景行行止而又奚遜焉所辭宜不允

中大夫參知政事龔

茂良

辭免修製尊號寶冊轉兩官恩

係禮儀使十一月六日

天以無疆之福敷佑我家丕延親壽予曷敢不鋪張揚厲以對越景貺乃仲冬日至親帥百辟並崇父母之榮號金石在列冠劍在庭霽景曠溫羣情悅豫歷觀書傳所記蓋未有殊尤絕迹可比於今者也卿以鴻儒碩望總領衆職淵原復貫既閑習乎禮文陟降多儀又厭服乎觀聽進階加邑於理則宜且大典慶成孰云僭賞自我作古寧問故事若忽然辭之殆非股肱喜哉之誼也

參知政事龔

茂良

再辭免禮儀使轉兩官十一月八日

鏤玉揚徽慶大上歷年之永連珠告瑞適仲冬朔旦之臨天人協應以在茲家國均休而未艾眷言近弼實贊昌期予欲新曠古之禮則汝明予欲展事親之儀則汝翼予欲播乾安坤安之樂於金石則汝聽予欲形天大地大之功於典冊則汝爲底績居多遷官匪過而乃力避便蕃之寵面陳確至之言謂將豫柅於泛恩豈必曲從於前比先勞後祿素嘉儒行之優下濟上行滋嘆謙光之美方共由於此道姑勉徇於乃誠所請宜允

附契勘

臣契勘故事在京臣僚上表辭免禮儀使轉兩官恩命奉御寶批降批答所請宜不允若依故事當只降詔臣今撰述書寫進入合依例請寶行下本院給賜伏乞
睿照

參知政事李

彥

顯辭免書撰冊文轉官

同前

內則父予外則君臣人之大倫也今者太上以仁聖綏壽祐以孝敬極尊崇天人和同福祿並應父子之道備矣元首股肱相須成體則於君臣之際可不共其光榮乎卿以名世之儒久儀廊廟討論鉅典被飾厥文所謂嚴樂之筆精淵雲之墨妙蓋兼之矣用是進秩不爲無名况賓卿四輔之列咨卿萬幾之事寵章徽數未嘗有靳而獨愛此一官乎所請宜不允

端明殿學士簽書樞密院事王

淮

辭免篆寶轉一官

朕登進輔臣用旋帷幄既不以一善爲最又不以考績而陟若乃國有大慶共其寵光則異數加厚羣臣莫望斯名位之辨等威之制也屬者備物典冊增尊稱於德壽閑休偉績振古未有濟濟多士咸以列侍爲榮時卿名儒服在樞近允資鴻筆載臻斯章慶澤之行當由貴始蓋有非常之功者必因夫非常之事有燦然之文者必濟

以懽然之恩典禮所關卿固不得而獨避也所辭宜不允

參知政事李

彥穎

再辭免撰冊文轉一官恩命

十一月十一日

昔大中祥符間執政王欽若陳堯叟皆以制述封祀壇頌之功起進顯秩載在國史有榮耀焉今朕修稀世之闕典加太上之顯號而卿以高文大冊發揮盛猷是用倣章聖舊規循乾道近比進階四品庸答儒效而免章沓至陳義益高謂朕方策勵事功愛惜名器而身參機政宜率縉紳夫遜禮之主也謙德之柄也大臣如是足勸多方豈以一官易此二美敬從雅志良極嘆嘉所請宜允

端明殿學士簽書樞密院事王

准

再辭免篆寶轉一官

同前

朕觀謙之象曰勞謙君子萬民服也詩之雅曰行歸於周萬民所望夫辭受明於上則廉遜興於下豈不所操者約而所利者溥哉日朕茂輯曠儀衍榮親之號而卿實聯政路宣秉筆之勞越進文階將侈邦家之慶不獨示卿之寵而已顧乃洴形冲避且以名器爲言蓋大臣民之表也故范宣子遜而其下皆遜是可化民成俗矣朕雖欲不聽得乎所請宜允

資政殿大學士知建康軍府事劉

琪

辭免起發本府教閱軍兵轉官許回授

十

一月十二日

卿名高九牧任重十連馭軍馳整暇之聲體國得忠勤之誼歌周詩而遣戍既有成勞馳漢爵以賞功可無異數故進階所以勸諸道而申命所以優大臣人皆曰然卿尙何遜

奉國軍節度使殿前副都指揮王

友直乞外宮觀十一月十六日

四牡之詩曰王事靡盬不遑將母此羣臣宣勞於外懷歸之辭也今卿以將帥之才爲朕倚信擢居環尹閱歲滋深夙興單衛上之勞退食享奉親之樂惟忠與孝寧廢兼資苟勉勵之有加立功名其未晚所請不允

龔茂良

辭免差權提舉編修玉牒十一月十八日

周用中士奠繫世漢晉命九卿典屬籍唐開成以玉名牒至與史冊並驅是豈古今異轍哉法寢久而益章官隨時而愈重故也况我國家發祥云遠祖功宗德視昔有光文昭武穆與天無極則夫創寶藏之殿設纂修之官總於柄臣理固當爾卿以經世之學華國之文參調化元秉德蹈義兼領斯事蓋優爲之豈以約史定令而廢閎綱之舉乎亟其欽承毋格成命